

Sheria kwa Ajili ya Furaha ya Mwanadamu

Maagizo ya Bwana ni ya adili, Huufurahisha moyo. Amri ya Bwana ni safi, Huyatia macho nuru.—**Zaburi 19:8.**

Hapo mwanzo, Mungu alitoa sheria yake kwa wanadamu kama njia ya kupata furaha na uzima wa milele. Tumaini pekee la Shetani la kuzuia kusudi la Mungu ni kuwaongoza wanaume na wanawake kutokutii sheria hii, na juhudi yake ya kudumu imekuwa ni kupotosha mafundisho yake na kudunisha umuhimu wake. Pigo lake kuu limekuwa ni jaribio la kubadilisha sheria yenyewe, ili kuwaongoza watu kukiuka maagizo yake wakati wakidai kuyatii.

Mwandishi mmoja amefananisha jaribio la kubadilisha sheria ya Mungu na tendo baya la kale la kugeuza kibao cha barabara kilichowekwa kwenye makutano muhimu ambapo barabara mbili zilikutana kuelekea katika njia isiyo sahihi. Mkanganyiko na shida ambayo matendo haya mara nyingi yalisababisha yalikuwa makubwa.

Kibao cha barabarani kiliwekwa na Mungu kwa ajili ya wale wanaosafiri kupita katika ulimwengu huu. Mkono mmoja wa kibao hiki ulionesha utii wa hiari kwa Muumba kuwa kama njia ya furaha kuu na uzima, wakati mkono mwingine ulielekeza kutokutii kuwa njia ya mateso na kifo. Njia ya furaha ilielezwa kwa wazi kabisa kama ilivyokuwa njia ya kuelekea katika mji wa makimbilio chini ya kipindi cha Wayahudi. Lakini katika saa mbaya kwa jamii yetu, adui mkubwa wa kila wema aligeuza ishara, na watu wengi wamekosea njia.

Kupitia kwa Musa Bwana aliwaagiza Waisraeli: “Hakika mtazishika Sabato zangu, kwa kuwa ni ishara kati ya mimi na ninyi katika vizazi vyenu vyote; ili mpate kujua ya kuwa mimi ndimi Bwana niwatakasaye ninyi. Basi mtaishika hiyo Sabato; kwa kuwa ni takatifu kwenu; kila mtu atakayeitia unajisi hakika yake atauawa; kwa kuwa kila mtu afanyaye kazi katika siku hiyo, nafsi hiyo itakatiwa mbali na watu wake. ... Kwa ajili ya hayo wana wa Israeli wataishika Sabato, kuiangalia sana hiyo Sabato katika vizazi vyao vyote, ni agano la milele. Ni ishara kati ya mimi na wana wa Israeli milele; kwani kwa siku sita Bwana alifanya mbingu na nchi, akastarehe kwa siku ya saba na kupumzika.” Kutoka 31:13-17.

Katika maneno haya Bwana aliuelezea wazi kabisa utii kama njia ya kuelekea katika Mji wa Mungu; lakini mtu wa dhambi amebadilisha alama, na kuifanya ielekeze mwelekeo usio sahihi. Yeye ameweka sabato ya uongo na amewasababisha wanaume na wanawake kufikiri kwamba kwa kupumzika katika siku hiyo walikuwa wanaitii amri ya Mwumbaji.

Mungu amenena kwa uthabiti kuwa siku ya saba ni Sabato ya Bwana. Wakati “mbingu na nchi zikamalizika,” Aliitukuza siku hii kama ukumbusho wa kazi Yake ya uumbaji. Akipumzika katika siku ya saba “akaacha kufanya kazi yake yote aliyoiumba na kuifanya,” “Mungu akaibarikia siku ya saba, akaitakasa” (Mwanzo 2:1-3) (Manabii na Wafalme. Toleo jipya, uk. 151-153).